



Extrait de la revue **SingulierS** du 1^{er} trimestre 2005

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : Contes et racontroûles d'Ârdène

Lès blancs cayoùs d' Nîves

Texte mis en forme par l'Abbé Raymond MOUZON,
d'après une enquête effectuée en 1984 par Jean-Michel PONCELET,
élève de 2ème année au cours de wallon à Saint-Michel à Neufchâteau.

Al sortîe do viadje dè Sûre, kand on va après Lèchrèt, on wèt, a drwate èt a gâtche dol vouye, dèss grosses blanches pières. Cès grosses pières la ki sortant dol tère n' ont nin vnu la totes seûles. Dju nos trovant dvant on mistère, d' après ç' k' on raconte a Nîves.

I gn-è d' ça dèss sièkes, al plèce kè djè v' dèjans, on bèrdjî avu s' tchin, wârdèt on tropê d' bèrbus. Noste ome n' astét nin motwat bin charitâbe, come on va l' vèy.

L' anjélus' sonét a l' èglîje. Èt vola k' arive adlè l' bèrdjî on vî mandiant, mâ mussè èt k' avét one figure dè Vinrdi sint. Èt rin k' a l' rèwêtu, on compèrnét k' il avét one fwîn d' leû.

Nosse vî ome aprotche do bèrdjî a lî djant : "vola sûrmint on brâve ome ! Vos m' dinrez bin on croston d' pwin, rin k' on bokèt ?...

Mês il avét a pon.ne dit ça kè l' mâvès bèrdjî apougne ès' baston èt voye sès tchins après lu. Èl vî ome, tot pin.neû, ann-è nalè â pus vite. Èt person.ne nè l' è jamês rvèyu.

Po ç' k' èst do bèrdjî, i n' è nin rintrè o viadje, come lès oûtes djoûrs, kand la nut' è arivé, ni s' tchin, ni sès bèrbus. Lès djins do viadje, tot d' sûte, s' ant dotè d' âke. Èt i z-ont couru vèy su la voye dè Lèchrèt.

Al plèce do bèrdjî, do tchin dèss bèrbus, i n' ant pus rtrouvi k' dèss blanches pières, dèss "blancs cayoùs", lès cîs k' on wèt co anut'.

Lès djins d' asteûre su dmandant bin kî ç' kè ça plét èsse, èç't-ome la ki passét inla èt k' on n' è pus rvèyu par après, kand il è tchindjè a pières el bèrdjî, s' tchin èt sès bèrbus. Dèss mâvêses linwes dèjant kè ç' astét l' diâle. Mês brâmint dèss oûtes crwayant bin k' ç' astét l' min.me mandiant kè Sint Mârtin lî avét dnè la mîtan dè s' mantê : Jésus lu min.me, dins sa toûrnée ki n' finit jamês.

Malêjis mots :

Âke = quelque chose. / **apougner** = empoigner. / **baston** = bâton. / **bèrbus** = brebis. / **cayoù** = pierre, caillou. / **croston** = crouton. / **linwe** = langue. / **motwat** = peut-être. / **plèce** = endroit, place. / **wârdèr** = garder.